

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA TEŠANJ
OPĆINSKI NAČELNIK

Tel: 032 650 022 www.opcina-tesanj.ba
032 650 547 E-mail: optesanj@bih.net.ba
Fax: 032 650 220 fuad.sisic@opcina-tesanj.ba

Trg Alije Izetbegovića 11,
74260 Tešanj

Broj: 02-02-1-959/12

Datum: 19.03.2012. godine

Na osnovu člana 15. stav 1. i člana 22. stav 1. Zakona o namještenicima u organima državne službe FBiH („Službene novine FBiH“ broj 49/05) i člana 30. Statuta Općine Tešanj ("Službeni glasnik Općine Tešanj" broj 11/07) Općinski načelnik donosi

PRAVILNIK o kriterijama provođenja oglasne procedure za prijem uposlenika

Član 1.

Ovim Pravilnikom uređuju se jedinstveni kriteriji, pravila i postupak formiranja rang liste prijavljenih kandidata za namještenika u općinskoj administraciji Tešanj.

Član 2.

Izbor kandidata koji su se prijavili na javni oglas za popunu upražnjenog radnog mjesta vrši Komisija za izbor (u daljnjem tekstu: Komisija), koju čine predsjednik i dva člana, od kojih je jedan predstavnik sindikata. Komisiju imenuje Općinski načelnik posebno za svaki oglas.

Član 3.

Oglas ostaje otvoren minimalno 15 dana od dana zadnjeg objavljivanja, a nakon isteka roka i zatvaranja javnog oglasa, te perioda od minimalno 5 dana a najkasnije 10 dana od zatvaranja oglasa Komisija održava prvi sastanak i pregleda pristigle prijave.

Komisija sastavlja dvije liste kandidata, listu kandidata koji ispunjavaju uslove (lista uspješnih) i listu kandidata koji ne ispunjavaju uslove javnog oglasa, te dostavlja liste službeniku za ljudske resurse.

Član 4.

Službenik za ljudske resurse obavještava kandidate koji ne ispunjavaju uslove javnog oglasa, uz ostavljeni rok od 8 (osam) dana za podnošenje prigovora na obavještenje.

Ako Komisija smatra da je prigovor opravdan može donijeti odluku u korist kandidata, a u suprotnom prigovor se dostavlja Odboru za žalbe.

Nakon isteka roka za podnošenje prigovora, i završetka postupka po prigovoru, Službenik za ljudske resurse i predsjednik Komisije pismeno obavještavaju kandidate sa liste uspješnih o vremenu održavanja intervjua, koji treba da se održi u periodu od 7 dana od dana obavještanja kandidata.

Član 5.

Prilikom održavanja intervjua Komisija ocjenjuje kandidate na propisanim obrascima, a jedan kandidat može osvojiti maksimalno 40 bodova.

Obrazac sadrži 8 (osam) kriterija od kojih se za svaki kriterij može osvojiti od 1 do 5 bodova, a ukupan broj bodova ostvaren po jednom kriteriju se dijeli sa brojem 3, te se dobiva prosječan broj bodova za svaki od kriterija, a kriteriji se odnose na:

R.br.	Kriterij	Član komisije 1	Član komisije 2	Član komisije 3	Total
1	relevantno radno iskustvo				
2	socijalni status				
3	borački status				
4	čekanje na posao				
5	motivisanost/entuzijizam				
6	vještina komunikacije				
7	potencijal za razvoj				
8	analitičke sposobnosti				

Izuzetak od primjene kriterija iz stava 2. ovog člana su slučajevi ukoliko je za radno mjesto moguće da poslove obavljaju invalidne osobe, a u javnom oglasu navedeno kao tražena dokumentacija, kandidatu koji ima dokaz o invalidnosti minimalno 60 % invaliditeta dodjeljuje se 5 bodova, a za invalidnost do 60 % invaliditeta kandidatu se dodjeljuje 2,5 boda.

Predsjednik Komisije će pripremiti uslove i plan rada Komisije za provođenje intervjua.

Pored navedenih kriterija, svaki član Komisije može navesti komentar o uočenim ključnim prednostima ili primjerenim slabostima kandidata, za koje smatra da su bitni za prijem u radni odnos.

Član 6.

Komisija utvrđuje redoslijed kandidata u skladu sa rezultatom koji se utvrdi dodjelom bodova prema kriterijima iz člana 5.

Ukoliko ni jedan kandidat ne ostvaruje prednost iz stava 1. ovog člana, prednost ima kandidat koji je ostvario više bodova po prvom kriteriju.

Ukoliko dva ili više kandidata po istom kriteriju ostvare jednak broj bodova, prelazi se na sljedeći kriterij, sve dok jedan od kandidata ne ostvari prednost, a ukoliko ni nakon toga nije moguće odrediti prednost, odluku donosi Općinski načelnik.

Član 7.


Općinski načelnik donosi konačnu odluku o prijemu kandidata, na osnovu dostavljene liste i prijedloga Komisije.

Član 8.

Ovaj Pravilnik stupa na snagu danom donošenja a objavit će se u „Službenom glasniku Općine Tešanj“.

Dostavljeno:

1. Komisija
2. „Službeni glasnik Općine Tešanj“
3. Arhiva



OPĆINSKI NAČELNIK
Fuad Šišić, dipl.ing.maš.